

皇明詞林人物考

皇明詞林人物考卷十二

楚麻城王兆雲元禎輯著

豫順陽李 蔭褶嫩閱訂

宋應元

鵞池生者姓宋氏名登春字應元趙郡新河人
生壯歲顙髮即衰白因自號海翁人業以海翁
稱之晚居江陵之天鵞池更號鵞池生宋氏故
新河農家其先嘗累高貲生少失父母以亡嘗
省家益貧然性嗜酒家貧不能長得酒則時時

發憤讀古人書見前世結纓射書擊筑棄印諸
賢豪急難奇節未嘗不慷慨悲歌泣數行下也
生始慕俠能挽彊馳騎間出其餘智爲小詩輒
自喜不欲以示人又稍稍通繪事師江夏吳偉
鄰之父有頎而鰥者生戲爲之貌絕肖父因勸
生益習此可作生業何乃日沉酣落魄里中也
生不應以是里中盡目爲狂生亡所知名年三
十會一歲間妻子女五人俱相繼死生仰天歎
曰嗟天乎將驅我於埃壙之外乎遂屏家於

其兄而自囊書遠遊遊至博陵博陵有故所
客憐之餽之塾舍二年生默默不自得竟謝去
去之京師日跨一蹇驢行長安道中往來覓詩
方是時臨淄布衣謝榛以詩遊公卿間聲籍甚
生間得其詩唾之曰作詩何爲者而令七尺軀
津津諛貴人丐活耶居京師月餘亡所遇又去
之渤海入兗州登嶧山觀秦皇帝遺碑還居長
白山一蕭寺出囊中故所貯漢魏盛唐名家詩
閉關揣摩如是者三年頗窺作者之戶遂大放

厥詞而於五言尤工眼駸駸白亡今人矣又去而浮淮海渡楊子江登北固山以望金陵鍾山紫氣過雲陽匍伏延陵季子祠下涉吳會訪錢唐天竺靈隱諸峰已復走徐青歸新河數日又去出居庸循太行山而西窮關陝澤潞諸邊塞其在井陘嘗居龍窩寺瓶粟罄矣寺僧厭苦之生曰僧毋窘我我試繪一小圖持至市中當得已而果鬻粟五升伺粟不盡不更繪而市人待生繪則日擔粟詣寺門相聒生不能堪

乃避至城外一山樓已由棧道入西川遊峨眉
山邈巫巴下荆鄂將達於潯陽返於黃迂雲夢
而北走大梁偶憇釣州四肆而釣州有党中丞
者得其所題酒肆中絕句詩強致之家畱數月
復自宛涉襄過京山生所跨驢蹶於唐氏之淖
傾其囊中書曝之衢唐氏異生所爲要與之飲
食歡相得也遂主唐氏一歲而行唐氏爲刻其
詩傳荆郢間更贈生二童子即生所呼爲丹砂
白石者生挾二童子轉江陵登王粲樓讀其賦

感昔賢流寓地有終焉之志始生數年前嘗至江陵居城西開元觀故遼王奇其詩召謁便殿生久在遼王所絕不與用事者比遼王常召生遊別宮聲妓滿前他客或故爲調笑以悅遼王生第端坐竟日夜即飲至大醉目不流睨遼王益敬憚生每見生輒爲斂容生之不及于難以此自遼王廢生不樂居江陵乃自攜少貲逍遙七澤間最後又還江陵遍謝其故所往來人而斥二童子姑去乃自童髮爲頭陀不知其所之

童子鳴

童子鳴者名珮世爲龍游人龍游地此口薄無積聚不能無賈游然亦善以書賈而子鳴之父曰彥清者最稱爲儒雅不佞然諾子鳴少貧不能從師塾遂依其父游得書輒問其父字乙之已稍遂能旁識已遂囁嚅誦之屬已遂能臆解之已遂業五七言古詩有清韻而其爲他文亦工尤善攷證諸書畫名蹟古碑彛敦之屬其游多梁溪梁溪諸公子心慕之爭欲得子鳴一顧以

重子鳴不爲逆時時有所過從至欲絃子鳴不能也而最後太保朱忠僖公與其兄恭靖王聞子鳴名而使其交相善者挾之至都子鳴爲一再過焚香啜茗評隲古書畫而已不復及外事二公旣重子鳴謀客之一夕竟遯去不顧子鳴面峻削骨立驟見人語訥訥不出口尤篤於交誼有所期雖千里不爽其所營纖嗇周身之外贏不能百一而倉卒以緩急請亡弗應者至爲德而人負之若已負德於人唯恐語及也爲人

孝友自天性其侍父舟車間雖寢溲必躬視養
母尤謹兄珊嘗舉於邑爲諸生以長者聞子鳴
游多浮期顧歸必就兄書舍買升酒相勞苦共
枕達旦至再夕不强之入不入也即貫鏹尺縷
悉以推其兄而至子鳴出而幙被不復問妻子
亦以兄珊撫之逾於已矣子鳴旣以文行重交
游間而高淳韓邦憲嘗一識於逆旅器之又數
從交游習子鳴名會出守衢首行部過其家龍
丘山塢中人不識太守鹵簿皆擁門矚觀尉史

游徼旁午顧見案上一拌蕨菜羹脫粟太守與
子鳴共而烏烏吟至夕始去咸莫測何謂子鳴
久之始一入郡報謝諸丞倅司知爲太守重客
禮之子鳴逡巡謝弗敢當太守急欲捐俸資爲
子鳴壽發言而子鳴恒自謂田父甘田中食不
憂餒也臺使者以太守故請見子鳴不得大索
其所著書子鳴謝亡有退而上其所輯唐故邑
令楊炯邑人徐安貞集太守爲餞梓行之太守
遂下邑綱紀南州杜門文舉首驂北海爲政康

成標里龍丘逸民之藪前長後珮千載兩賢長
猶托蹟功曹一試綦組而童君畢志雲蘿聲蹟
俱挫可謂皦然不緇瞻之在前矣間者一造其
廬談討松桂寥廓之士邈焉寡儔太守不德白
駒用慨其樹楔左間以風在野子鳴固辭之邑
不得乃謂其令曰夫不佞珮者而敢當我龍丘
先生也夫龍丘先生以一握耒起不毛之山而
使山至今而借其姓以顯奈何惜勺漿之享以
報之龍丘先生者太守所謂長也令涂君乃爲

祠祀龍丘長而記其事子鳴生平布素無長物
僅一復陶而從客所有呼寒者即解衣衣之不
復徵薄田數十畝忍口腹得少羨輒付義施旅
指衆而俗三男一女子鳴捐羨粟以給舉女者
又以貧不能延稚子師則又歲割租若干俾延
師其所施行類非貧士也跡所自供養蓋貧士
蹙額所不忍儀而太守韓君卒子鳴徒步送其
喪踰嶺憊而病夢太守邀竝駕子鳴以婚嫁未
畢辭不可覺而自疑久之病寢劇卒年僅五十

五一子尚幼子鳴有藏書萬卷皆其手所自讐
校者生平冒雪游九華山登南嶽祝融坐雲氣
間泰山日觀峯候夜半出日以爲奇遂有九華
游記南嶽東岱詩及他文集龍游縣志若干卷

徐文長

顧季狂

鄭虛舟

山陰徐生渭字文長蓋以文自戕者也語云王
以瑜琢蘭以膏焚豈虛語哉初生之輝赫黌校
也是堂俞公實助其先聲及後聲聞臺省聲聞
督撫聲聞館閣則生自有以致之不意竟以白
鹿一表心悸病狂因之罹變繫獄後雖得釋然
亦蹇躓甚矣有徐文長全集梓行于世

顧山人季狂者吳人也名聖之少好遠遊寄名
籍吳中耳客趙王又爲楚游至余邑累月題詠

頗多汪伯玉守襄陽時刻其北遊湯稿亦能書
倣山谷體

鄭山人名若庸號虛舟亦吳人也趙王聘至鄴
授簡相應如響王甚重之與交賓主之禮著作
頗多曾採掇古文奇事名類雋行於世

彭稚脩

公名翼字稚脩江西南康人豫章之俗好談性命政術不喜爲古詩而持論繩人特甚稚脩自爲諸生時獨心好詩性落魄不拘小節又好交海內賢豪長者以是動與其俗左然實慷慨自喜士也其詩上下風雅而力追當世之作者當其遇合指事引類宛麗清切渢渢乎嘉隆間名士儔也旣數困春官去而爲蘭溪學博會其令與邑大豪閼稚脩雅善令率諸生助之理豪爲

蜚語聞 上雅脩度不能勝棄官歸豫章而里
中妬者大快其事雅脩意益不自得疾竟甚卒
所著有聽雨齋詩集

沈君典

沈公名懋學字君典萬曆丁丑之第一人授翰林院脩撰而其第二人則故相國江陵公之子嗣脩也沈先生旣負國士材器相國得之喜以異日有通家子可憑而先生嘿嘿其間嗣脩亦不可得而親踈居六月而相國有父喪內意欲畱之而外廷以爲不可然莫敢倡言而先生奮然貽書其客某侍郎勸之奔喪復貽書責言路諸貴人以不能匡正而某侍郎故嘗與相國計

奪情者發書強嘻笑而已言路諸貴人愕然不能答而先生意未已復貽書嗣脩謂相國爲

天子師表奈何弁髦綱常而棄之飽人以口實嗣脩愿亦不能答先生乃與其友翰林編脩吳君檢討趙君汝師謀各上疏請止奪情且屬草而曰上即幸聽二君子疏已足不幸不聽則必且禍二君子我得以疏解之或有濟乎不然是我曹自爲名而使二君子無繼也尋二君子疏上相國果恚而取中旨欲下之理先生知

事迫復具疏大略謂 上以仁孝治天下必不
忍奪宰輔情即不獲已而奪宰輔情必不忍更
以是罪言者袖而入長安門道遇坐主舊吏部
詰先生所往得其故即請疏觀之已納之袖曰
中有謬誤可再商也吏部知先生疏上必重禍
故以難先生不獲請出而呼書疏者書甫訖則
二君子與他言者并杖 闕下矣先生自恨甚
親爲傅膏藥啖以湯粥度其出國門即移疾在
告滿三月上書稱狗馬不任史職乞骸骨生還

故里相國業已聞沈先生諸前事大恨曰我何
負於天下而動魚肉我若是縱沈先生歸於是
諸得相國心者頗以其所忌畏揚於人冀有以
報而江南諸大吏則爭釣奇欲以沈先生身爲
餌餌相國先生臥陵陽敬亭之傍築一室溪水
中兩頭貯書藉坐起唯意長嘯自舒適有某中
丞者伺先生過亡所得得一不羈客羅致之欲
使自誣共先生爲妖言客至死不能染而相國
意亦小緩先生乃稍稍憇息九華尋西遊猗中

陟白嶽黃山沂嚴灘下羅剎江汎西湖六橋葑
惝兩高之勝時曇陽子道成矣訪之而語合曇
陽子且化去頗屬意於先生已而夢之上帝所
有所遇自信以神仙可立致而天下之事亡足
難者然弗能遽絕耳目之好欲兼得之而客以
異端進謂循此亦可襲而得道如悟真之謬注
先生信之方自以爲快而病乘間起矣會相國
之子書報先生爲相國殊自悔不能以金馬三
尺地畱先生使天下笑我且人生若隙駒不以

時樹勲業而坐槁巖穴爲筴得耶否歟先生心
動且促焚客聞之則爭趨先生門周旋報謁亡
寢食暇而病益劇遂卒其父少叅公寵爲名臺
察馭歷中外皆著聲實而又好稱餘姚之學先
生顧不肯帖帖一家言工屬文亦不純治經誼
而徬通諸子史尤精於天文地理黃石陰符短
長姑布方朔之術爲人短小精悍秀眉媚眼便
捷饒力善射步走山礪若飛以至跳丸弄鉤戲
馬擊球鼓琴握槊諸技亡所不習曉寬仁喜施

意豁如也嘗上春官不第則走之塞上長揖大將軍與談縱橫略行游獵出飛狐穿塞抵花馬池而後歸悉攬形勢要害營壁堡壘目眺手畫慨然有封狼居胥意暇則與六郡良家子射生取燕血作生洛河倒服匿注桐馬酒使胡姬剪頭雛歌出塞吹觱篥而和之塞外客見者謂是何吳兒貌而氣凌我出傖父上數倍也先生家故饒以義散之揮霍千金不挂齒旣爲俠不已則漸窶而亟從他豪借貸以繼或風之輒咲曰

裴叔則何人哉損有餘補不足豈所不解而從
汝曹斤斤升斗如十三賈人子亦禪中死虱耳
以故其賜及第日而賢豪搢紳甲冑下至劍客
酒徒亡不扼腕言國家必有異禎乃得先生而
及其歸亡一鳥散者出則益麇集而至于死相
率悲惋而嘔誅之州里遠近不問識不識咸咨
嗟歎恨其不可作先生之詩與文不名一家而
縱橫捭闔往往出人意表人亦喜稱之而不自
畱藥草余與先生交頗洽常錄得

其數十首然亦非全璧

周公瑕

公名天球字公瑕吳郡人也吳故多文士待詔
文徵仲藝苑領袖獨器許公瑕故公瑕爲諸生
時文譽已隱隱起歲丁未督學豫章胡公得公
瑕所試賦極爲嘆賞遂檄來南都脩譜系及庚
戌莆田黃公來復加重公奈屢困於場屋遂罷
去而以詞賦及臨池之技顯名無論中土即四
夷之人購得公片楮者皆知寶重之公詩尚才
情警拔不欲作流易語書於鍾王最爲入室世

言公錙銖於阿賭以余友公若干年見公於意
味投合者殊無所覲不然弇州先生以一代詞
宗何其禮重公若此耶

居士貞

公名節字士貞別號商谷吳郡人乃文徵仲高足弟子也尚氣節不肯媮媮以取媚于人臨財最有分辨雖其末路竄甚竄徙無立錫竟不甘趨謁繪事甚得徵仲心傳字與詩亦自師門來而劑以趙松雪陸放翁與余稱石交其贈行詩卷今猶珍襲之詩云王家子弟自風流文彩翩翩動五侯擲地有聲新作賦傾城倒屣舊交游月明赤壁磯頭鶴花滿金閭壕上樓老我一琴

君解識臨觴再鼓思悠悠

王叔承

崑崙山人者王姓初名光胤字叔承以字行遂更字承甫嘗慕崑崙山在西大荒稱天柱因自號崑崙山人旣而曰我何以智巧爲更名曰憨憨人且以我憨幻也更字曰子幻而號夢虛道人然所謂憨憨不怛施刺謁叩之人且不知亦無以夢虛目者山人之父某倜儻負才氣涉獵稅文嘗客吳越中推長爲豪數以誼耗其橐裝不顧僅餘書萬卷而已乃自崑山徙吳江之嚴

陵村西竝五湖東濱爛溪意甚樂之山人生十
二父且死從伯氏受博士家言爲時業斐然矣
而心厭薄之竊踣處治古文辭伯氏見而罵曰
縣官開古文辭科者烏頭白矣山人短不能六
尺方顙秀眉目肥白如瓠性資絕穎異過目輒
成誦而終不能帖帖於博士家言其試有司亦
詘而好酒復好遊遨挾彈鳴瑟過從俠邪少年
母夏怒而笞之至百始稍折節爲孝謹而屬
貧甚不能婚贅錢翁女又以不能骯髒事錢翁

若媼攜其婦出錢翁怒之不予一錢山人仰天
笑曰彼豈以我秦贅耶乃益治古文辭山人之
於古文辭亦不帖帖模倣先則含茹淳渟溢而
後決之犬或千言小者數語奇雋疊出前茅所
指亡不魄奪草靡山人名漸籍籍而貧益甚又
以家中倭他徙客有商生少年善遊與山人謀
曰吾聞趙王賢而好客諸王子儀之三臺之傍
朱邸鱗櫛皆幸舍也我曹可以彈鋏乎乃治裝
偕與之鄴而鄴時有客謝榛鄭若庸皆以文重

於王鄭叟於山人有鄉曲好爲稍稍游揚之諸
王子間以牢醴先山人而山人司知二君雖重
客然見必蒲伏稱主臣歎曰屈吾膝而奉吾口
腹何策會商生病死葬之銅雀下因東之齊魯
登泰山觀出日北入燕中時 天子方坐竹宮
祠釐諸貴臣應制謨箋表歌聯之屬山人爲興
化相君所物色授以格君謝弗能第爲草游仙
數章 天子覽而異之相君大重山人延之直
所得縱觀上林太液宮闕池島花木禁蘖之勝

爲漢宮數十曲稍稍聞中貴人相驚謂何物客
能麗語若此爭遺之尚方法酒而山人間行謁
王太史元馭太史性耿介不食酒顧獨與山人
善往往傾家醞盛饌以羞山人不醉飽不已相
君迫應制使使四出縱跡山人不得至則以醉
踉蹌前喻藝不辨相君乃使其所善風之曰生
幸減縱遊使我不虞緩急即一官千金胡難山
人搔首曰相君駭欲以富貴縻國士相君乃謝
山人曰負上恩不能遽歸從山人游請俟異

日於是山人益爲落魄游而范太史伯楨胡侍
御原荆顧憲副益卿皆宦燕中陳光州貞甫時
尚游太學與諸君善慕山人而致之邸相與痛
飲歌呼擊缶談權千古元馭徐規之曰咄咄正
平大雅不受少年窺耶山人乃嘿嘿不自得而
會讀莊子逍遙遊至秋水意豁然悟曰歸乎枋
榆蹄涔吾固有之一日買款段還謝母夏以闕
供養夏撫之遂依依膝下而夏嫠居久精心奉
佛山人則亦奉佛與藜藿甘而獨不能忍酒

說母夏曰非酒也佛所謂米汁也亦嗜之母說
爲進一觴醕而胡侍御以強諫罷里居則挾山
人汎輕舸御軟輿以游揚子之南錢唐之北諸
名勝亡弗探也作吳越游編顧益卿宦閩則游
閩窮七臺九鯉九曲之勝飽荔子而歸作荔子
編陳貞甫宦楚則游楚瀟湘洞庭九疑衡嶽爲
几案物矣作楚游編家居自原荆而外范太史
三之王太史一之所造即主不在而兒子輩出
侍呼阿父家人迎拜我公漿酒肉炙若流山人

所遊諸君官中則不問官中事於家不問家事
間一二涉倫常勇施息競則取裁山人指不恡
矣客遺之酒則樂遺之金錢束帛則不樂自謂
于文喜孟軻莊周屈平左丘明兩司馬于詩喜
曹植左思郭璞阮籍陶潛謝靈運謝眺鮑照李
白杜甫王維于酒喜劉伶嵇康于遊喜梁鴻梅
福壺丘宗炳于俠喜季札魯仲連于隱喜東方
朔王君公郭太徐穉黃憲管寧嚴遵孫登于禪
喜龐居士蘊于仙喜呂真人

高其所自操行
結亦不必盡似

胡茂承

胡山人岳松字茂承新安人也茂承甫弱冠仰
事大父母而下撫仲季食僅指甚衆拮据無
遺力乃大窘母黃孺人命之曰商維揚間茂承
而商猶之宋人資章甫而適越不類也口伊吾
市肆中日夕不輟衆商怪之曰子休矣商安所
事此茂承曰謹謝敎人固各有志耳即日棄歸
大父問知狀則又益喜曰我固爲孫謀若此矣
迺茂承又不肯屈首業舉子獨好讀古文若左

言才ノ多ニ
一

國莊騷太史公班椽諸書尤所酷嗜間發爲詩
歌詞旨跌宕曾不以貧故少落以故歎多君子
長者莫不善茂承而樂與之迂久之歎曰丈夫
安能齷齪窮季久居邑屋乎于是鼓篋遡江淮
涉汶泗徘徊鄒魯之墟至於闕下意在覽大

都名邑高山巨川從海內學士大夫講藝談道
以自廣其於勢位榮利漠如也當是時文貞公
在事或謂宜緣舊德往見不應而獨與二三省
郎結社燕市楚人曾公省吾從社中與語大合

遂定交焉間謂茂承以君之才稱于大夫奉太
對何有旣已跣跣不受羈紲將稍就武科射策
以自見孰逾君者茂承咲曰足下眎生能卑卑
汚辱中從短後健兒角腐鼠乎孰與高岍長裾
誦說先王與當世長者遊以自媿快即大將軍
不易矣其持論如此茂承旣名起京師搢紳多
欲見之然非其好不見顧時時有乞詩文者亦
藉其金錢間歸上大父母壽至其遇故人緩急
輒挺身救貧者輒周之雖已事不辦不計也曾

公以大司空歸里蒙難茂承獨間關儼然赴之一見泣下所以周旋其難者靡所不至往來漢濱者凡三不啻萬數千里竟以是故行至南陽道死矣而所嘗結社順陽李比部襲美者力爲經紀其喪歸仍梓其僅存稿以傳

楊貞復

公名起元字貞復別號復所廣東歸善人也由
丁丑進士選翰林庶吉士官至吏部右侍郎公
天稟醇厚滿腔中俱是惻隱以人皆可以爲善
孳孳接引後進學不厭誨不倦此仲尼之所以
自名者公蓋竊有志焉而寔不敢違者也其古
文詩草皆純正典雅借題目以發明道術而於
墨卿騷客丰規兼而有之允矣一代儒宗也

莊梅谷

公名履豐號梅谷福建晉江人刻有梅谷先生文集黃太史汝良序略曰先生少負異質弱冠即善古文辭下筆數千言嶂絕驚人丁丑登進士又曰先生年少都詞林游精著作之苑信其天授可以直之無前而能斂才以就格至於雋氣颺舉巧思淳發觸心遇境神情畢會則又未嘗以格揜才今觀承明應制諸篇冲融典則何啻升潛溪烏傷東里長沙之堂而紀興贈言迅

言木ノ外ニ一
者一ニ
三三
寫所自得運靈機啓妙鑰試與獻吉元美于鱗
伯玉數公角逸足於三駟之間猶未辨其誰勝
也豈非兼至之技而無難于所難者哉

黃德卿

公名道月字德卿合肥人也行次居仲人多稱
爲黃仲子云美姿態身長六尺工文詞喜讀相
如書與百家之言五七言長句絕似李青蓮是
德卿固詞人乎哉然少好擊劍江淮之俠無不
從仲子講劍且焉不惜百金購名馬挽強弓蓋
其志摘豔秣林揚戈溫隅絳旗雷鼓與昭銘鴻
勒共耀當年矣丙戌計偕飲陳通叅所汝南劉
玄子後至見座上有美丈夫即欲把臂爲懽問

姓字各驚訝客散陳獨留此兩人接袪連觴漸
近談矣陳公喜曰二賢已列榜中各大咲醉去
旦視榜僅隔一名繇是見如故人良與同榜潘
元徵平湖王銘新秀水黃履常無錫安小范共
玄子爲生死交元徵白面髯長數尺仲子狎而
呼爲潘髯元徵置酒招諸子仲子小范夜方至
曰余非由五侯七貴家來與安三來自滿井耳
井水溘溢余樂之飲大醉即提巾脫頂髮委地
鏡人坐誦所賦滿井詩若白雪清風與俱飄飄

謫仙人也京師大雪仲子約玄子小范過黃履
常齋樓廷東榭登而望西山之雪仲子倚榭浮
白目光與雪射爛若燭銀長嘯內激山水盡裂
雪詩超卓字畫遒勁有張芝皇象風雪晴周氏
民部子春約玄子與仲子小范游西山仲子所
幘衣半臂紫袷坐連錢驄馬挾彈飛鳥應手而
落遊人從之如雲即以鳥犢游人爲之語曰得
山禽從舍人悲哉仲子豈五陵少年挾彈渭橋
上邪嘗見楊司徒曰黃舍人偉幹雋流終當建

勳萬里外不爾風節矯矯表論朝宁匡衡劉向
之直非復背毳故公卿見者莫不以是望仲子
嘗謂玄子曰衷眇逢干之心略非仲毅之智理
非蒙莊之達寧人乎今世文學北地信陽它無
聞也吾黨豈弗肆咤天下厭談兵嘉峪不守岷
山獨石胡娶婦雲中今邊如奕非亡奕秋亡枰
子耳枰者馬也子者兵也亡之即奕秋且袖手
有之則戰者必也寧與角和乎一日仲子飲玄
子舍歸德楊給事至相談名理見仲子揮麈息

聽給事曰今赴曾司空楊司成談所幸同去甚
堅玄子目仲子仲子曰學之不講是吾憂也不
從學奚從邪至則楊司成問曰何謂朝聞道夕
死可也道無生死生而非生死而非死虞澹然
驚顧玄子曰孰謂仲子雄于詞豪于技哉真吾
玄子友也頃聞父訃仲子嘔血立毀別玄子燕
市畱詞曰燕雲斷今雪飛黃鵠決今羽稀江有
蘭兮愁余虬螭繆兮踟躕生有交兮死不離鳴
呼此非靈均招魂夫躬絕命詞與仲子旣葬其

父號于墓而仲子死仲子之哀又何烈乎蓋孝
弟自天性有五兄弟如友生漢州公饒于才名
道日字荆卿酷似仲子所著書若干篇行于世

張惟守

公名文介字惟守生於廬陵長於龍丘遷於錢唐浙之東西人也賦性清虛存心和厚襟度穆如清風軒裳視同飄瓦故發之聲律皆多雅趣舊刻如代贄題竹醉吟孤憤金陵遷杭湖上諸稿已爲益府選入十二家明詩矣後復有近作若干卷行于世俊逸清新兼而有之其所作詞如湖上新聲之類又有若干卷陽春白雪信乎寡和詞林莫不艷賞之

王伯固

王一鳴字子聲又字伯固號石廩又號叅上黃岡人也幼即以穎異稱弁而出試督學使者大奇之弱冠舉于鄉登萬曆丙戌進士高第是時不佞寓書止其母綰銅墨綬而寧坐苜蓿齋中也蓋公素游神文翰簿書尾瑣似非所宜者公亦然之而主爵者竟以太湖令授公蓋爲他日臺諫地耳公至抑志勵精民事頗多美政顧不能骭骹以事尊官調臨漳令亡何以疾卒於官

言才／卷十二
公生平慷慨多大節其於世味澹如也古今竹
素多所關覽文宗史漢詩不徒規撫杜工部務
求挾其精髓每一讀輒批評而封識之如此者
凡十讀十批評焉其稱詩大與汝陽秦秦京合
京名鎬蓋亦一志攻杜氏詩者公著作頗富尚
未梓行然神物自應爲世寶豈得終秘之帳中
耶不然者卞氏之玉當竟在璞中矣

寇巨源

寇山人名學海字巨源楚之廣濟人也苦志騷
雅曾削髮入盤山中捷戶數載研究詩家妙旨
大有所得而後畜髮出其冬日晚登黃鶴樓詩
二首云滾滾長江帶落暉仙人樓閣轉霏微雲
寒大澤漁歌斷沙冷晴川雁字稀檻外鳳凰銜
月出風前鸚鵡挾濤飛莫言黃祖難容物詞賦
于今有是非又凭闌極目萬山浮慷慨翻憐據
上游伯業已隨孤鶴去樓臺偏壓大江流烟迷

言林人集卷十二
三十一
遠浦千帆雨濤觸寒磯五月秋笛裡梅花莫吹
落恐驚夕晚怨淹畱觀此二律他作可槩觀矣
生平磊落慷慨不拘拘小節游道方廣而一疾
物矣詞場每爲之惋惜

凌以棟

公名稚隆字以棟號磊泉浙之湖州人也其游
國學時幾登賢書而復棄斥者屢遂嘆時命之
不偶而一意於古文詞左傳史記前漢三書俱
遍搜名公批評梓之自有意見者亦竝附焉極
其精當又纂輯五車韻瑞大爲詞林諸公所鑒
賞其文筆以時而進卓有三史之風誠爲稅藪
之功人而文家之詰匠也至於人品行誼又當
於古人中求之俟鴻筆爲之表章茲不具論

凌玄旻

凌湛初字玄旻刻有凌玄旻集錢唐陳大經叙
略曰玄旻軼蕩蹕邁矚然立風塵之表唯恐氛
垢之或緇操觚染翰無論尺一咸鑄思鏤神埋
玉緯錦直欲上追兩漢之雄渾爾雅總總離合
以至不食不寢迨已病病而究極揣摩不廢遂
至沉骹不可起矣倬偉之志不一售才猷不槩
見而沉鬱汶泯以卒夫人皆悲之矣而孰知其
所以死者死以文也以文而死以死而梓其文

則死者死矣而不死者自在也思玄旻而不見
見玄旻之所爲文則玄旻固不死也莊周曰有
死也者有不死也者玄旻其有不死也者夫

李惟寅

李言恭字惟寅泗州盱眙人別號秀巖臨淮侯
庭竹胄子也侯之先寔出岐陽武靖王文忠文
忠爲佐命元勳相傳從戈矛以翊皇運而馬上
誦讀迄成通儒及 寵掌司成任兼文武至今
稱之厥嗣盱山公紹承祖烈開府湖湘其宏德
邃學莊簡恤士又當文怡武熙千載一時之會
由是觀之公子之詩學所由來遠矣予亦識其
人樸茂不作武人貴公子態楚游稿貝葉齋稿

言木ノ外ニ云
行于世詞林名士皆在其結納中

皇明詞林人物考補遺

張亨父

公名泰字亨父本姓姚氏世爲崑山人曾祖瑞
代晉陵張某戍太倉衛遂冒其姓泰生而秀穎
書過目輒成誦性豪邁見時輩日夜兀兀抄讀
陳腐文字頗鄙笑之登進士爲翰林庶吉士名
隱隱出行輩中遭父母喪服闋除檢討聲名籍
甚四方之士願受學焉久之陞脩撰踰月得暴
疾卒泰爲人坦率絕去厓岸然憤世嫉邪特甚

酒酣耳熱談論當世不平之事激烈奮發爲之
攘臂岸幘恬淡自守獨喜吟詩所著有滄洲集
行於世

黃孔昭

黃公名克晦字孔昭晉安人善山水尤工詩其
爲詩意常獨造一以古人爲宗而不蹈襲其語
初從晉安泛彭蠡遊匡廬渡九江從武昌登黃
鶴樓吟眺久之乃來金陵在匡廬贈僧有道高
弟子堪傳少行苦鄰僧共住難之句盛仲交亟
稱之然孔昭遊楚詩佳者固自多也其來金陵
客黃以藩館中每從以藩遊金陵諸勝遊輒賦
詩以藩輒收而錄之成帙莫廷韓張仲立初未

與孔昭接見其詩愛之攜歸吳中仲立序而刻
焉命曰金陵遊稿

吳子玉

公名瑞穀字子玉新安人博學尤工古文詞有
吳子玉集四冊詩亦典實然構思良苦其入社
詩云銀燭金杯向夜清初冬風日似春城帝鄉
古渡枌榆社官舍新驩薜荔情遂弄潛漪雲外
度劍開繡澁斗邊明遨遊上國延州事欲聽簫
韶入座音雪中借馬云白下久聞歌白雪不妨
雪裡過論詩雲司肯借三花駿柳外還教十里
騎剪拂憐才心獨許驕嘶嘶意步應遲馮驩不

用悲長缺青眼孫陽一顧時美人走馬云遊睇
過金埒方瞳起紫塵迴花雙弄影入柳一傷神
試體疑矜寵嘶馳欲帶輦裾翻纓絡急裙閃障
泥新輕似臨風迅驕還顧步頻金羈搖釧穩朱
汗透蘭紉飄去香垂手散來雲滿身未須看步
襪陌上遍生塵其詩大都如此文亦如之要之
濯濯求新即有晦澁亦所不惜耳

劉子威

劉公名鳳字子威蘇州人也所著有劉子威集
又有太霞草等集蓋洋洋乎大觀矣內鄉李太
史子田評云劉子威掘奇索隱抗心無前凡所
注筆動依古矍其眎當世流輩蔑如矣故其詞
賦奇字瑰語多不可句將毋謂智者過耶嘗觀
自古文士雖分旆揚鑣而究其指歸無逾兩途
倣左語也過則體裁古而意不融鬯取宋人也
近則意流放而體不老蒼舉斯二者未有能兼

焉者也即子威之所自負固大人與稽矣意欲
兼擅于此哉其昵魏季朗並李于鱗咸可以論
子威矣

魏季朗

魏公名學禮字季朗長洲人以貢入太學初與
劉侍御千威遊結社相倡和有比玉集後又與
黃太學孔章遊刻采蓉辭崑山連壁蘭澤同心
王中丞謂滔滔洪藻名下固無虛士矣青溪癸
酉之會季朗作下第入邀笛閣社詩云漂泊猶
存原憲風不將名墮五陵中梅花吹落思桓子
蓮社邀來異遠公古渡霜寒流水在石城秋盡
暮烟空蕭條莫問招賢事回首荆山泣未窮

閣在

詞林人物考

卷十二

三九

棘院前
故云

又邀笛閣云王令風流尚可攀何人清
弄水雲閒月明朱雀音疑吐梅落長于人未還
憑檻成懷生折柳倚床別思在關山桓生千載
知公等暮雨蒼茫苦竹間

沈子由

公名啓字子由號江村吳江人舉鄉薦七上春
官始第授南京工部主事以具上供樓船及修
陵寢事爲其尚書所知考績改刑部進員外
郎郎中察能出知紹興府請于臺平其屬邑會
稽蕭山新昌賦其人德之時朱中丞統嚴船禁
而郡要路薦紳爲恐喝間阻且持美遷啖公以
公能得中丞驩而解之公不聽遂銜公刺骨而
公遷湖廣按察副使公方佐其中丞張公岳破

言在八卷者 卷十二
黑苗寨以功狀聞而紹興之間行公罷而朱公
尋坐累不良死公歸絕口不言官事築室仙人
山以著述自娛耳目聰明飲啖步履如少年久
之卒年七十八子孫多顯者公所著有家居稿
南北稿西臺稿越吟稿楚吟稿雞巢嶺稿南廠
志牧越議略吳江水利考杜律七言註晴窻便
覽若干卷

陳公獻

公名璋字公獻河南光州人也七歲舉奇童郡
太守鄧公令賦卿雲立就數千言稍長工詞賦
精右軍書性貞介褫身脩潔以孝友聞弱冠登
高第守景州五年冰蘖如一日清徃役革積弊
者三百餘戶理馬甲虛冒民免累及子孫者守
備紫荆等關自浮圖峪達廣昌一帶邊牆皆躬
督脩葺有碑紀述其事安撫青兗礦徒二千餘
令自解散九河水患由阜城築堤至德州迄今

平成頌陳堤父老立祠血食薦剡屢上陞太平
府同知建松江府城倭寇作舉經略才 欽委
協同蘇州府同知任環操練籌畫公上禦倭十
二事切中機務自統兵敗倭斬首千餘級餘寇
浮海東遯重蒙 欽賞詳見憲章錄維時身任
軍旅不廢嘯詠與江東諸名公唱和海內爭購
薄䟽以爲珍寶 朝議叙功當顯陟緣不阿相
臣轉司寇郎公日坐署中操觚染翰以纂述自
見李于鱗王元美徐子與無不推許公者公不

樂仕進歸臥星湖杜門著書四十年闌闌罕晤
其面足不履公庭有司屢請乃一入飲立義學
義田教養宗族其鄉里親戚貧乏者每加周給
郡人士有污行恐陳公知文行踴躍咸稱太丘
云子九鼎有對君軒集公七十應本州聘著誌
書十六卷文辭高古有良史風又星湖湧稿四
十卷葆光堂別集三十卷陳氏世範二十卷鷄
鳩集四卷防倭錄二卷太平事略四卷行于世

楊伯翼

柴仲初

公名承鯤字伯翼浙之鄞縣人也父美益官北
畿督學御史伯翼乃公幼子也少而聰慧書過
目不忘初入學食廩後爲太學生其詩刻意一
成輒不竄易鄞舊有詩社俱以沈嘉則爲宗主
獨伯翼出不由其門雖爲後進遂與沈頡頏惜
其不壽以四十卒所梓有西清集碣石編行于
世同邑又有柴仲初者亦梓有小集翩翩有致
何四明材士之踵相接也

顧行之

顧山父

顧行之名聞號九變其子山父名孟林自號兀然吳郡人也行之少而游心枕文已有聲公車業然竟不得志於公車一志古文辭流易自放天貞爛如華不至靡勁不示骨其啓兀然先生母亦少陵氏之必簡乎哉誅頌則潘左儔也山父隱于周山間風期高亮無所不窺而尤邃于詩陶寫性靈一言一味皆有情致五言古有彭澤蘇州之風七言古今體可當常侍隔河軍壘

言方ノ外ニ
五言律置之襄陽集中鹽梅共味惟七言絕句
卑之稍就晚唐耳

張恭懿

公名瀚字子文號元洲公生二十四年而以易
領鄉薦二十五成進士大爲王文成公所嘆賞
汎覽羣書尤酷嗜左國莊騷至寢食俱廢遂燁
然成名當世初筮仕南北郎一造船再讞獄勤
慎稱職已知廬州減賦墾田教民築堤濬池歲
旱澇則身爲犧以禱視囚雪陳邦寬諸政斧斷
理解不減包孝肅爲治行第一補大名值庚戌
虜變募兵入衛尅期立辦諸郡莫及公兩爲大

府廉直不阿每與臺使裂齟爭可否如辯開守
誣禁巡司賄至今邦人稱之時公亦以異等擢
潼關治兵使已叅嶺藩未幾調蜀晉閩又自晉
杲轉陝西左右轄凡十年三入關即其地擢巡
撫都御史防穰固原不撤兵虜躡入以我軍有
備宵遁撫終南饑民須臾投戈散去遂卿大理
貳刑部後以兵貳兼憲職督漕運移督兩廣芟
劇賊定羅甸會有駕禍於公者功高不賞時論
其錯謝歸起原官再撫關中遷掌南臺南大司

空值 今上即位召入爲吏部尚書時楊夢弼
病免會推三人 上越次用公公荷 上簡任
持衡數年所殿最黜陟務以進賢退不肖爲主
每錄選人姓字上注 御屏欲 上時時目之
又議酌選規行久任崇實政遴真才稽章奏重
責成嚴考績慎拾遺要以愛惜人才本之忠厚
自公宅端揆而一時吏治喁喁近未有也公爲
吏部幾再考滿 上益冲懷嚮治注意老成故
相江陵亦嚴事公長者未嘗不藉公爲重逮奪

情事起微 上中旨屬公諭畱故相亦自削牘
咨公諷使畱已公謬爲不聞也者故相始不悅
因嗾臺臣中公以歸飄然嘯咏湖山間迨計聞
卹贈謚蔭備極優渥公善書法兼工點染詩若
文莊嚴典則歸之爾雅有美囊蟲餘二十卷續
集二十卷松窓夢語八卷臺省奏議十四卷藏
於家

張孟獨

公名治道字孟獨號太微關中人也少負才名以明經登甲榜出宰劇邑赫赫有聲取入爲刑部主事一時海內名士皆納交焉居無何即謝病歸矣歸二十五年凡有所得悉著於篇積至若干卷將藏諸家笥沒世始傳爾時巡撫聯峰翟公聞之亟欲板行用彰厥美比因索藁弗與迺購得他本持去西夏臺中刊已過半矣適戒行有日仍令兵憲徐君續成之第工未就而亦

去矣松石劉公繼至尤雅重其所作檄而刊之
康對山序其首稱爲鮑謝復出接武李何云

馮汝仕

公名世登字汝仕盱眙人也年十四補邑庠弟子督學使者歲校居高等廩食當選貢讓于友人吳大章曰大章親老宜祿養登尚壯可少待也當路咸嘉之聲稱籍籍越數年當歲貢復讓于友沈君次年方以貢訓順德型範最端士人咸爲之嚮風三署邑篆如邢臺鉅鹿皆稱畿輔嚴邑公攝之裕如鋤奸化盜植弱恤孤懿政芳聞至今猶在人口乃以賑饑勞瘁疾卒于官年

言
卷之二
纔五十有一生平倜儻負大節鄉行最著不可
枚舉善詩文下筆纚纚千言如注東逝之波學
者稱爲崑岡先生順德祀名宦祠盱眙祀鄉賢
祠所著有易論九更崑岡文集物類訓春秋筆
義等書行于世又聞公少日從甘泉湛先生遊
爲高足弟子其淵源盖有自云

胡元瑞

公名應麟字元瑞浙之蘭谿人也舉孝廉屢上
春官不第即罷棄公車業而一志於詩生平最
推尊王元美次則汪伯玉二公於元瑞亦極其
稱許各有撰著頗悉無容再贅惟紀其著作詩
有寓燕還越計偕岩棲臥遊長嘯三洞兩都蘭
陰畸園等集二十餘卷詩藪內編外編禰編二
十卷胡氏筆叢四十卷他論著未行世者有六
經疑義二卷諸子折衷四卷史叢十卷史評十

二卷皇明詩統三十卷皇明律範十二卷擬古
樂府二卷古韻考一卷二酉山堂書目六卷交
遊紀略二卷堯玄國志十卷酉陽續俎十卷隆
萬新聞四卷隆萬禱聞六卷駱侍御忠孝辯一
卷補劉氏山棲志十六卷蒐輯諸書有羣祖心
印十卷方外遐音十卷澄懷錄一卷抱膝編十
卷真賞編十卷會心語四卷他書未成者又數
百卷著述若此可謂富矣與余素相傾慕萬曆
辛丑冬月始晤於杭是時元瑞將束裝返里矣

一見驪者平生譚聚數日不能舍去元瑞最好
藏書其所未見而余偶得者約余今歲携至秣
陵詎意元瑞遂化爲異物聞之不勝西州之愴

懋忠

公名洪憲字懋忠別號葵陽浙之嘉興人也舉
丁卯鄉試第一辛未會試第二由庶吉士官至
少詹事中忌口歸歸十年卒方爲諸生時適嘉
靖末年文體濫甚公獨刊落枝葉根極名理三
試不售不爲改步會隆慶元年有詔黜浮崇雅
公遂裒然冠賢書制舉義出文體始一振戊辰
不竟試歸公故不急一第乃愈湛思精苦齒血
湧出不爲止已忽于靜中有得文以益工辛未

第二報至公側臥不應曰咄咄吾文未盡吾量也其自負如此公詩文羅合千古諸變無所不備尤喜談舉子業若有夙解者故至晚歲斲輪技癢猶時復遊戲刻有黃學士官中稿當在副使公憂中有易說春秋左傳釋附老子解蒙莊獨契讀禮日抄諸書迨歸田後有秀水邑志碧山學士集皇明文憲俱殺青未竟藏於家其用世之略與中葉語之故皆已詳碑銘中

董伯念

公名嗣成字伯念別號青芝浙之湖州人大宗伯份之孫也萬曆庚辰進士授禮部主事歷轉祠祭司郎中萬曆辛卯以立諸建言爲民歸

董爲浙喬木右族組紱蟬聯公雖世胄淬礪名檢以高賢大良自期故其歸也於家人生產必正其兼併者而反以是賈禍輶轡幾不可解誰謂斯民也爲三代直道而行者耶公生而多材藝且濟之以博洽善吟咏工書法旁及繪事能

言本ノ物也
會前人筆意超然有簡遠之趣卒後殘楮遺線
畱人間者爭相寶畜之

徐惟和

金玄朗

黃白仲

徐燧字惟和福州閩縣人中戊子鄉試多大度不拘小節家甚貧好賓客凡遊閩者無論尊官賤士無不得見徐君戶外四方之屨相錯如市或遊困不能歸者傾橐以贈人咸謂爲窮孟嘗云著有幔亭集絳囊生傳行于世年四十齋志以歿

金朗字玄朗蘇州吳縣人起家甚貧先世墓誌王元美先生志之詳矣其人短小精悍多氣節

言林人物卷十一
嘗爲董儀部伯念客遊長安使氣五侯七貴間
人目爲狂生著有於謳集客死東平州州守聞
其名爲之經紀其喪以歸

黃之璧字白仲紹興山陰人其人嫵媚有書才
遊長安入勛冑幕後爲彈章波及歸臥武林鬱
鬱不得志客死安慶太守林榕門公檢其遺稿
刻之命曰娑羅館集并歸其喪

鄔汝翼

鄔佐卿字汝翼中憲公之季孫也少穎異不羣
讀書過目卽能成誦旣久亦不遺忘弱冠補郡
博士弟子員惟潛心墳史不屑屑于制義善譚
當世務或遇知己疊疊忘晝夜事有不平者輒
捥腕激烈必思所以平之勞怨弗顧也中歲謝
博士業一志古文詞居恒屢空略罔介意所爲
詩歲不下數百首雖稍傷率意而該博雄渾每
出人意表以故海內名流樂與之交好晚年粗

涉二氏之典卽謂冲舉上昇計日可得蓋孫太
初之流有託而逃耳萬曆甲午秋歿于杭州西
湖禪林年六十有三所著有漫遊稿金稿纏纏
頭集芳潤齋集若干卷

原缺

葉化甫

公名春及字化甫廣東歸善舉人一志聖學所
寘力者惟淡而不厭一語爲兢兢一切世味擺
脫都盡其爲閩清教諭時 穆廟初應詔上書
纒纒數萬言均保泰藥石柰乏鍾期塵塵鳴琴
惠安再貳鄖郡旋向羅浮老也世或以負氣太
高嫉惡太嚴爲公病豈知公者哉其所著綱齋
集言言逼古譬之商彝周鼎摩挲之未有以爲
近代物也又聞公家羅浮去江門不數百里早

聞白沙勿忘勿助之旨與羅文恭往來十年文
恭寄書有窮高極深神遊八極之語蓋期之也
而公以尚綱名齋有味乎中庸闇然之趣矣

何震川

王師竹

何公名洛文號震川由嘉靖乙丑進士選翰林庶吉士官至禮部侍郎河南信陽州人卽大復先生孫也箕裘之業自能世美無庸贅贅所著有越游叅游諸稿其父小坡亦有詩名但未得覩其篇什爾

王公名祖嫡號師竹由隆慶辛未進士選翰林院庶吉士官至右庶子掌右春坊亦信陽州人也公詩氣韵冲融首尾勻妥絕無斧鑿鉅釘之

迹讀公詩者知其從大復派中來也借其全集
尚未殺青海內人士不勝旃檀之慕

帥惟審

公名機字惟審江西撫州臨川人隆慶戊辰進士官至南京刑部郎中不佞南游時公曾折節與遊其襟度開爽議論侃直不徇時俗見人片長亦賞譽不去口有古休休大臣之風焉其著作甚古雅所傳有兩都近稿郭青螺先生序其擬古詩云惟審所擬古詩擬漢而漢擬魏而魏擬晉而晉宮商中響繁約合軌取鎔前韵自鑄偉辭猶之雕玉作瑚璉何異夏商設色貌古人

不直鬚眉而已

劉長欽

公名紹恤字長欽楚之安陸人隆慶戊辰進士官雲南僉事所至輒能其官人爭頌譽之生平好讀書上下古今良史及究心當世之務愛人子弟才者亟憐之譚經術夜分不倦歸田益閒暇肆力於著述常讀晉書掩卷曰詞大不古雅當爲改修復拂衣起曰生人不滿百何自苦如此然其志趣所寄可槩見矣所梓有臨安集工臨池之技章草頗得史游筆意常寄聲於余期

言本人生才
一把臂而余浪遊靡定竟無從一識荊州也

沈純甫

公名鍊字純甫號青霞嘉靖間由錦衣衛經歷
上書詆宰執宰執嫉之力構其罪賴聖明薄
譴徙之塞上當是時公直諫之名滿天下而其
所著爲詩歌文章又多所譏刺稍稍傳播上下
震恐始出死力相煽搆而公之禍作矣沒後仇
散事明公之故人俞姓者乃輯其平生所著若
千卷行于世讀其集無有不酸鼻流涕者集中
所著鳴劍籌邊諸什讀之尤令人激發其子俱

言林八物志卷之十一
賢而有文天之所以報善人者固自不爽云

王明甫

公名道行字明甫山西人由進士官至右布政其刺蘇郡政成化洽頌聲四溢爲右伯時年方四年不久卽已懸車壯歲歸田無幾微滑其中捐俸買山著書逃禪翩翩千仞之上視塵世軒冕皆爲腐鼠矣別業稱桂子山庄日與騷雅之士觴咏其中所著有桂子園集又有桂子園別集其稱集者公所自爲詩文也古色鬱然久已傳世其名別集者乃王元美皇甫百泉陸五湖

張嵎嵎蹇理庵張周田諸名公所贈遺者也周
田卽公門下士

蕭以占

公名良有字以占楚之漢陽人嘉靖甲子以易
舉于鄉年十四猶然髯角童也庚辰以春秋冠
禮闈多士一時傳其制義以爲不媿唐瞿諸先
輩云公襟度恢豁洞示底裏與人接不飭觚稜
自忘其爲尊貴人亦忘其爲文士是以得親公
者如坐春風中油油然不能捨去而其解諭德
綏歸也四方問公起居者猶趾錯於道非有所
沾漑於衷能然乎人或以和求多於公夫礲礲

者易缺皎皎者易污是豈和之過歟涉世之難
自古而然矣其所爲文與詩大都類其人士林
咸推重之有集若干卷藏于家

江民瑛

江民璞

公名瓊徽郡人在諸生中輒有志述作會有疾
謝學官去遂壹意修辭嘗讀史慕太史遷爲人
作而嘆曰丈夫不能周游四方友天下之士徒
抑首蓬戶享其敝帚將爲遼東豕邪於是操舟
東游登禹穴入浙觀海潮浮于五湖問闔閭春
申故址遂杖馬箠之秣陵朝故都焉入郢聽歌
郢中望高唐汎雲夢而下其游知交傾東南之
美矣比還郡郡中諸儒宿學爭願交山人驩山

言林八先生集卷之二
人挾一騶奴篋書而出過故人厚善者輒肱篋
發策喜人彈射其文猶能推轂後生務章人之
善士以此益附之入舍下帷讀書卽家人治生
業紛紜萬端不爲亂其精如此山人故多病乃
學養生爲軒岐之言必入其室其一切從事不
遺餘力蓋天性也山人善聲詩尤長於古體季
珍亦能詩

朱明虹

艾熙亭

魏崑溟

公名孟震號明虹江西新淦人隆慶戊辰進士官至都御史巡撫山西公雖尊貴人乎游神竹素遇詞場同調之人卽折節爲禮故士多附之而所著詩集與楮談之類皆自成家其必傳無疑也

公名穆號熙亭楚岳州人嘉靖戊午舉於鄉其爲大名學博能識趙夢白於諸生中官刑部主事時值江陵相奪情抗疏論劾被杖謫戍過余

邑相訪猶扶創揮毫慷慨杯酒無逐臣灑淚濕
纓之態後起累官僉都御史巡撫四川偶病卽
乞骸歸生平著作以條暢爲尚有賈長沙之風
而詞調亦未嘗不蒼然沉鬱也詩清婉有致
魏公名允中號崑溟大名南樂人萬曆庚辰進
士偉行瑰致爲士林冠冕而博士義壹稟於先
民之度至今傳以爲式其所梓詩歌與古文辭
卓然名家公其兼材也哉

廖鳴吾

公名道南號鳴吾湖廣蒲圻人正德庚辰進士
主翰林侍講學士上命修大禮書經筵輪
講多直言日食陳天變四事時多譴之公所著
有玄素子及楚紀孫公承榮序其楚紀云明興
肅皇帝起郢中一時雲合響應之士如茶陵張
文邦齊安王稚欽沔陽童士疇蒲圻廖鳴吾皆
翺翔禁林騰驤菰圃而廖太史受上知渥眷
遇殊異所納約於講筵摘藻於應制杼枕於

導媿不啻綜典引而頌聖德陳樂職而歌皇雅
乃讒以寵回妬緣才誨投閒澤畔年所多歷間
賈其蒐獵之勇發其憤懣之襟墻皮鉛槧軸插
篇翰著書滿家楚紀實其大者觀其殫精九年
網羅千載遡源雲祝泳洪 昭代統極皇至芳
揚側逸幽貫神明鉅該禮樂略物產以寶賢黜
機祥而放怪卷六十以當甲目十五以配望楊
氏草玄俟子雲之在後子長述史承司馬之世
官抑錯六銖而裨袞綺煉五石以補乾維如

用我執此以往乎顧道存未究厥施言立僅書
之策其志亦足悲已

劉晉初

公名昂字晉初號望岑其先湖廣大冶人高祖以武士隸高皇帝麾下積功授長淮百戶故世居長淮及公始遷於郡城由進士官至山東按察司僉事少負奇崛抗志往昔議論踔厲斤斤斷斷當官以振刷爲聲而其卒於官也橐笥蕭然無以爲殮攻古文辭濡毫立然而精深瓌瑰之致可儷古人所著有劉望岑集此其人之品與稅之品皆不可無傳者也余過中都有以

是帙來請者余不辭而收之續簡

殷文通

公名士儋字正夫由進士官至大學士當肅
皇帝時推擇爲青宮師保及莊皇帝踐祚以
舊學膺爰立之命所以斧藻聖謨斟酌元氣
宏猷鉅烈格于黼黻而隱乎人耳目所不及
者不可勝紀乃其于千秋之業承邊廷實之後
與李于鱗氏相左提右挈力挽澆漓之習而求
復諸古雖或各有所負未必能相下而有以相
成今觀公著作上緣六籍下浸兩京沈思入玄

鍾音中律卽降而與文人學士定從於騷雅之
壇猶將執牛耳而命之况經世之業又章章如
是乎所梓金輿山房稿若干卷行於世

顧有終

公名伯謙字有終號起亭臨淮人鄉貢進士公
方嚴古朴卯角時已無童心言動舉止一如老
成人好收奇籍有聞必欲得之得則窮日夜誦
不已由是以博洽知名其所著有起亭存稿稿
而曰存則其佚者不旣多乎觀其直已陳德長
吟梁甫畫菊三顧圖諸作慨然慕孔明陶潛之
爲人秋暝篇異馬歌紀夢不一而足寓情輔世
成名有超忽騰蹕之勢辭雖不盡法古其志壯

矣苟假之年沉浸風雅澤以冲和雖升相如之
堂而入子雲之室可也惜乎夙志以沒

楊文懿

公名守陳字維新鄞人景泰二年進士授翰林
院編修成化八年累官侍講學士內艱去一官
五品十六年或諷公援有力者謝曰我婺婦抱
節三十年今老矣改志耶 泰陵出閣簡公曰
講時文華大訓成篇目放大學衍義顧事涉中
官卽刪去公毅然曰是不足訓迹其善惡得失
條錄以進尋陞少詹事兼侍講學士 泰陵卽
位進官寮官柄用忌公擬侍郎南吏部 上覽

疏曰守陳宜留此卽塗去南京字弘治元年疏
論講學聽政累數百言 上是公言後御經筵

又御午朝召輔臣坐論政事閱章奏皆自公發
之公在吏部侃侃持正論 憲宗實錄充副總

裁再請解部事專史職不允未逾年懇辭請老
歸卒謚文懿贈禮部尚書公孝友方正與人交
篤於信誼居常恂恂身若不勝衣言若不出口

至說理論事辨是非毅然不可屈博學多識文

詞淳雅五經四書時有獨見不泥

古說錄爲私抄凡數百卷

蘇平仲

公名伯衡字平仲其先居眉九世祖卽文定公
文定公長子諱遲以宋徽猷閣待制工部侍郎
守婺遷家於婺故平仲遂爲金華人起前鄉貢
進士選爲國子學錄卽升學正上親擢翰林
國史院編修官以贖辭歸宋潛溪以翰林承旨
致政將還天子命舉代者卽以公應詔旣至
復固辭上亦憫其誠特賜文綺楮幣遣之天
下學士高平仲之文而莫不惜其以疾困也潛

溪稱其文精博而不龐澀敷腴而不苛縟不求
似古人而未始不似也以余觀之大都有三蘇
丰度云

劉元定

劉啓周字元定別號斗隅蜀之西充人幼聰穎
不類凡兒兒時善駢語應對如響年未十屬文
詞片晷立就邑稱奇童其父贈君公厚期許五
經諸史靡不日課弱冠以博洽聞督學使者隨
試書莚論表策疊疊數千言縱筆成篇學使者
靡不擊節嘉賞以蜀先輩名流方比謂子瞻用
修之徒也歲丁卯巳中西川第一會經題魯魚
之訛主者竟落之然珍惜不置袖其卷如珙璧

稱爲遺珠沉淪庠序二十年壹意下帷不少輟
歲己卯應諸侯王貢持書數卷一蒼頭步騎入
長安同居亭者或醉麴藥携粉黛自娛公獨淡
然無營讀書樓頭呶唔自若友人各嘆服外心
稍歛投籍成均覓一齋舍置墳典六籍其中題
其壁曰魚鹽滋味鐵石肝腸觀者以爲名言相
勸服膺維時大司成錫山周公少司成東粵王
公以季試拔之首日垂青眼屬以京闈元魁偶
奉例歸試于鄉復操瑟齊門不獲售喟然嘆曰

予之不濟此命也歲乙酉檄之曹近陽先生領
西川學政行部川北得公卷讀文若論大驚咤
曰此蜀材也乃于太學生見之確許首舉且謂
一論酷肖蘇長公自遜弗及藩臬長訊以蜀元
卽以公應將徹棘曹公候榜門外傳者曰解屬
某曹公曰非也又傳曰解果某曹公堅曰非也
已而報解屬劉公曹公曰是也榜出果然一時
喧傳以爲勝事是科蜀賢書刻公書莧二論表
策都出公真墨主者直損之無所益錄奏長安

公孤卿貳爭構之覽而大異謂主司經月累日不能就者公以寸晷成之如崔之政論賈之治安言言國是此菀林不常有滿以大魁屬目竟不第許穎陽相國延爲西賓避嫌謝不敏相國復託諸貴人彊賓之堅却不樂赴三上春官三報罷遂焚香棄去舉子業矢以著述終其老友人以顯親勸者始慷慨就選時同里陳玉壘相國欲慫慂以美秩善地公抗志不聞命東西南北聽命之所之耳謁選得滇河陽令雖司理民

社日以誦讀校讎爲事古籍不須史離側諸當事以文兄屬者鱗集簿書古文詞逢原以應比補黔之清平地狹而界於播播囚稱難屢逆顏行常僞檄旦暮蹂蹋境土公靜鎮不爲動日吟咏書史有賦詩退虜之風播平敘功欽賞有差擢長沙丞不期年投劾以歸歸無何尋卒公爲人坦率無他骯髒有古人致生平不辨菽麥不事生產不較子母錢無寒暑晝夜只作蛩吟醵飲有梨園飲不樂必屏去而後快而孝親友第

其六節也所著有四書詩經題意五經蠡測選
家刻後塲註解字解家學與地圖考仕學集要
孔明辨諸集子文琦登辛丑進士筮宰楚之麻
城神君慈母之頌籍籍羣口宦業方興且嫻於
今古文詞爲寓內人士傳誦矜式云

勅封文林郎顯考行狀

先君諱傳字爾習號雁峯西溟其別號也先世河南之汴人洪武初始祖諱佐者避兵亂徙居朝邑之泊村遂占籍數世後始有科第自高祖登庚戌進士歷合曾祖僉憲公祖府公迄先君凡五世甲乙科代不乏人關中文獻亦多屈指先君賦性端厚沉靜寡言笑居止有常髫年卽嗜學不與羣兒戲嘗謁大司馬韓恭簡公一見奇之曰此子厚重如山

異日必當大貴後隨先王父任長垣下帷閉
戶伊吾不絕家人罕窺其面弱冠入膠庠嘉
靖庚子捷鄉試時纔年廿一耳榜中推轂年
少問學該博者必首先君先王父守相州捷
音至張兩赤幟于署門遠邇嘖嘖稱世德焉
柰數奇屢試春官不第先君倦遊兼以家貧
故乃謁選天曹董董得一高邑令高邑者畿
輔巖邑也民狡黠健訟先君至剔蠹布新令
行禁戢不朞月邑大治然先生性倨簡雅不

喜妍阿時有鄰郡倅以公委至先君待之稍
不屈倅銜之中以飛語先君曰世圓吾方可
以去矣遂掛冠歸時嘉靖四十五年十二月
也歸之日行李蕭然宅不東拓畝不西益家
有舊田廬課農訓子之外足跡不入城市卽
鄉飲大典邑侯臨門敦請皆力辭不赴蓋恬
淡無求天性然也隆慶三年不肖舅季三人
同時鼓篋迨後漸登癸酉丙子鄉薦不肖又
徼天倖叨中式禮闈拜晉陽司理任滿以例

言木ノ生ニ
二
邀

天寵封先君如已官先君捧

綸誥焜燿沾沾色喜家自先世無他積惟多古
書先君暇日益肆力于學無論子史百家卽
內典諸書無所不窺且長于詩賦居常感時
咏物吊古懷人長篇短什纍纍篋笥間大爲
當代名家張周田朱明虹王龍池諸公鑒賞
所刊有西溟集煮石餘談等書不肖自筮仕
理官及給事南都分憲河東皆迎先君任邸

先君周覽山川遍歷名勝多所論著在晉有
入晉稿在白下有南遊稿在河南有聲詩濟
美等集皆付之剗剗藏在家乘先君生平雅
慕陶彭澤杜工部之爲人其聲詩莊雅春容
亦頗似之每接邸報見四方多事憂形于色
每每見于吟咏又目擊依阿澆忍纖趨卑疵
者則亟唾之每戒不肖曰爾寧鈍寧遲毋效
此輩以玷家聲先君襁褓棄母中年棄父哀
號怨慕柴毀骨立其送終諸儀一切纖悉周

言本ノ外ニ
備自歸田後捐俸餘爲先王父母剏祠殿廡
偁竈罔不肅潔又置龕繪像歲時焚香供祀
不少輟雖年躋耄耄每入祠瞻拜未嘗不雪
涕沾襟前馬文莊公先君同年也嘗詣祠稱
其事歿如事生事亡如事存他可知矣前歲
年登八袞不肖兄弟以爲此人子愛日之誠
乃廣設賓筵遍乞名筆稱觴爲壽先君時童
顏鶴髮紫袍黃蓋飄飄乎若神仙中人鄉里
羨之稱盛事焉先君素強飯無疾不意今歲

患腹痛匕箸漸減形體亦漸厄羸杪秋又添
泄痢遍延醫藥皆不奏效竟浸淫以沒嗚呼
痛哉先君性仁慈處里黨恂恂宗族饗食不
給多所賑貸接故舊以禮訓子孫以義方待
臧獲輩嚴而有恩遐升之日無遠邇老稚識
與不識聞之皆爲流涕足徵德義之在人心
者不可泯也嗚呼痛哉不肖輩孳孳在疚不
遑啓處有先君之懿美不忍俾其闇沕弗彰
敢徼惠 當世鴻筆爲泉壤重倘蒙 惠顧

前好施及九原 賜之金玉以垂不朽則存
歿銜結寧有旣哉寧有旣哉

先君生于正德十四年正月之初十卒于萬
曆二十八年八月之二十六得年八十有二
上于本年十二月初三日擇舊塋之壙與
先慈郭孺人合葬焉先君丈夫子五人嗣初
國子生嗣中儒士嗣蕃癸酉舉人嗣美卽不
肖庚辰進士江西叅議嗣盛庠生女二一適
壽官同朝恩一適劉時端孫男子九人于豐

于鎬于京于廷俱庠生于陞選貢生于岐于
階于周皆幼孫女九人一適潼關趙主事世
德子昌遜一適邑生徐延恩一適郭大有一
適周紹先一適李本深餘幼曾孫男三人欽
祖繩祖憲祖曾孫女六人

不肖男嗣美泣血書

明勅封文林郎高邑縣知縣雁峰王公配郭大孺人合葬墓誌銘

賜進士第亞中大夫山西承宣布政使司左叅政前奉

勅分守河東邑人王學謨撰

賜進士出身奉政大夫南京尚寶司卿左輔年家晚生馬慥篆

賜同進士出身承德郎兵部職方司主事年家眷晚生趙世德書

言木八卷之三

二

王子曰維昔余未綰髮西溟王公薦賢書夙
以嫺于風什籍甚縉紳間冉冉若干年獨建
旗鼓形于清詞妙句者爾雅溫厚卒成大家
嗟乎關以西洵多賢如公瑰瑋卓爾不群者
有幾迺其質行德厚流光所從來遐矣西溟
王公者朝邑泊村人也名傳字爾習本號雁
峯其稱西溟意有所獨注也少而開敏賦性
端重沉靜寡言笑綴學善屬文見者知其非
凡品也而大司馬韓恭簡公竒其玉貌重焉

後從尊人長垣任下帷洛誦家監罕窺其面
自是學益進選充膠庠弟子員乃以嘉靖庚
子同閣學馬文莊公洎余先伯兄舉于鄉室
邇會晤臭味同也顧屢試南宮不第竊歎數
竒與吾對公車間關而老不如仕以行志於
是謁選授高邑令高邑三輔下邑俗故狡黠
嚚訟姦利萌生公剔蠹布新令行禁戢居亡
何不下堂而刑清政舉四境鄉風當是時諸
郡縣纖趨卑疵以游媚富貴公抗志獨行耻

見羶途媿忍會郡倅行縣盛氣蓋人公伏謁
不肯少屈倅銜之形於辭色旋爲所螫公悵
然曰世所謂方枘圓鑿齟齬難入者非邪飄
然納綬去之洛水之濱隱焉囊中靡一長物
故有田一壠畊不東拓宅不西益積書萬卷
關覽其中恢乎其大也已乃經術課子若孫
掩關高枕翱翔乎著作之林足不履城市卽
邑侯延與讀法堅不就萬曆癸酉丙子少叅
兄弟後先與計偕庚辰成進士司理大原以

奏年績公偕配有今

封命已司理晉南掖垣憲僉山右公所至周覽
山川容與名勝或感時咏物吊古懷人長篇
短什纍纍不絕諦者無不洞心駭耳今所剖
劘入晉南遊諸稿聲詩濟美煮石餘談布在
宇內中丞張周田朱明虹觀察王龍池爲之
擊節嘆賞嚴重公雖吟咏自恬愉乎聞四方
脊脊多事憂形於色至於鼎貴乘執阿附諂
諛鄙其人因以戒子姓若曰衆所曹惡勿蹈

此轍貽世姍笑以玷我家聲蓋其持正見於
憤世疾俗者如此先是公襁褓背母中年棄
父哀號襄事柴毀骨立幾不勝喪縣車以來
思慕意氣未平乃作剏祠不翅閼宮置龕繪
像歲時伏臘祀事唯謹雖年逼崦嵫猶匍匐
瞻禮未嘗不欷歔雪涕以常往馬文莊公過
里謁造祠下亟稱事死如事生事亡如事存
者公庶幾近之頃享年八袞無論親疏遠邇
相慶公猶神王卽百歲不翅越二歲庚子八

月二十六日偶寢疾遽爾承諱譚者以爲公
孝友仁慈故其所鍾情者厚里戚周宗黨義
方課子故舊不遺宜人人之服臆永喟傷懷
也邑君郭孺人有士行公爲諸生攻苦則佐
膏誦讀人曰有雞鳴警旦之風旣而筮仕掛
冠數以安貧相勗有順命之義勅子姓惕時
績學無異和丸之教旣被象服衣食不改於
初綺縠視如布素豈非貴能勤富能儉者哉
其它憐貧卹媼助昏振急卽脫簪不吝真淑

援也詳具王太史誌中不具列公有丈夫子
五人嗣初國子生嗣中禮部儒士嗣蕃癸酉
舉人嗣美庚辰進士江西布政司叅議嗣盛
諸生息女二人壻爲同朝恩劉時端孫男子
九人于豐于鎬于京于廷俱諸生于陞選貢
生于岐于階于周于國孫女九人適者潼關
趙主事世德子科諸生邑子徐廷恩郭大有
字者周紹先李本深餘幼曾孫男三人欽祖
繩祖憲祖曾孫女六子按公之先世居汶上

洪武初始祖諱佐者避亂徙今之泊村家焉
數傳而諱𡵿者起家弘治庚辰進士爲公曾
王父尊人諱三省癸未進士繇長垣令歷二
千石以循良著聞正德十四年正月初十日
生公生平腹笥群籍敷藻春華豈不能華國
展猷獨以鯁直不能諧時爲宵人排擠拂衣
弇身進能治人退不失已純終領聞公蓋有
焉乃其子若孫益以經術彩筆爭雄簪紱之
緒蒸蒸日上四世甲科世德茂矣少叅持狀

徵惠一言余追惟公與先伯兄善往寄贈余
海上戀戀不置比余西歸方圖曲席論文乃
奄忽分今古悲夫卽不敏非余銘之而誰也
銘曰嗟王公爲列宿蓄之泓施弗售賦歸來
甘貧陋思羹墻時薦酎蒐典墳胸何富登詞
壇疇出右享彭年足仁壽嗣振振美而秀身
雖沉兮名實副德流光兮徐以觀其後

王氏重光集敘

古今門望莫盛於王氏任昉爲蕭遙光薦王
暕表七葉重光海內冠冕沈約云身爲四代
之史少好百家之言開闢以來爵位蟬聯文
才相繼未有如王氏者王筠自言其家七葉
之中名德重光人人有集非崔應范諸宗可
比唐神龍間王方慶進上世十一代二十八
人書書雖不得與集並亦稅苑稀事矣余嘗
爲臨海王茂弘敘濟美堂集乃復有朝邑三

王公何王氏之盛踔絕今古也蓋藩伯實之
公父西溟公以孝廉仕爲令坐直道黜其所
著曰入晉南游二稿西溟集王父潼谷公以
進士爲令舉最擢吏部會赴父難委去調戶
部歷官郡守致其仕歸所著曰潼谷集曾王
父友山公以孝廉爲郡理歷官僉按察事所
著曰燕石稿其在成弘間者有不盡之才情
而不失於寒儉在嘉隆萬曆間者有合作之
聲調而不失於纖靡若弓冶箕裘之巧相發

也若畱畚播穫之功相成也若垣墉塗墍之事相因也不朽大業萃於一門三秦誠多豪傑不可有二矣三公以清白貽子孫家亡何有而獨寶守遺編若河圖大訓九鼎宗器豈夫圭組綺紈自雄里閭者可同日而語哉五胡之亂中原板蕩文獻悉歸江左西北實少絀焉而三公秦人特起直與六代時吳越名家等埒以此思難難可知也國家一元文明之會薄海同風遠過前朝如王氏者所由來

長遠矣藩伯都爲一集詔示後人而余目之
曰重光則王氏故實云爾又嘗考王楸叢書
自導至褒九世立傳自洽至肅九世有集彥
昇元禮休文所見才七葉耳藩伯而下其麗
不億不顯亦世是集也美哉始基之矣

南新市人李維楨譔